

Van Harten willkamen to de sesste Plattdüütsch-Week 2018 !

In dat Jahr 2008 hett de Kreisdag Freesland sük de Europäisch Sprachencharta to Harten nahmen un besloten, `n Barg mehr dafür to doon, dat uns nedderdüütsch Regionalspraak erhollen blifft. Wi willt Platt plegen un stönen, waar dat geiht.

De Plattdüütsch-Beupdragten Wolfgang Busch, Georg Schwitters (bis 30.09.2014) un Hermann Wilken hebbt veel in Gang brocht un ganz gezielt de Kontakt to uns Börgerinnen un Börgers söcht. Dat eenstimmige Besluten van de Kreisdag in `t Jahr 2016 över de wiedere Bestellung as Plattdüütsch-Beupdragte bit 2021 drückt de hoge Anerkennen för de bither leiste Arbeit ut.

Dat Hauptoogenmark von ehr Arbeit liggt bi de jungen Minschen in `t Landkreis Freesland. De Erfahrung wiest, dat hör dat een grote Freud bringt, de gor nich "uncoole" Spraak to lehr`n un to snacken.

In de torüchliggend teihn Jahr hebbt se ehrenamtlik Plattdüütschmesters för Scholen wunnen un utbildt, in Kinnergoorns mit de Kinner platt snackt, Volkshoogschoolkursen anboden, Böker över Vagels un Planten up Platt herutgeven un dafür sorgt, dat Plegers in Ollenhüüs mit de olen Minschen platt snackt.

Mit de Plattdüütsch-Week van ` 22. September bit to `n 07. Oktober 2018 much de Landkreis Freesland an de Erfolge van de eersten fief Plattdüütsch-Weeken in de Johren 2008 (Jever), 2010 (Varel), 2012 (Sande) 2014 (Zetel) un 2016 (Horumersiel)de so good ankamen sünd, ansluten. Dat Programm wendt sik weer an all Öllersgruppen un wiest in Lesungen, Konzerten, Gespreeksrunden, Kark un Föhrungen, wat för een Veelfalt van Klang un Klör de plattdüütsch Spraak hett.

Kreisdag un Verwalten van de Landkreis Freesland seggt de Plattdüütsch-Beupdragten Wolfgang Busch un Hermann Wilken van Harten Dank för de gode Organisation van de Plattdüütsch-Week 2018. Uns Dank gelt ok all de Lüü, de to disse Kultur-Week wat bidraagt un ehr Tied dorför insett.

De Besökers wünscht wi veel Pläseer bi `t Tokieken, Tohören un Snacken un villicht ok dorbi, dat een de plattdüütsch Spraak för sik sülvst weer nee upspört un bruukt.

Sven Ambrosy
Landraad